

(अष्टमोऽध्यायः ॥ वर्गाः 1-31)

(9)

13

(म.9, अनु.1)

ऋषिः काश्यपः असितः देवलः वा	छन्दः गायत्री	देवता पवमानः सोमः
सोमः पुनानो अर्षति सहस्रधारो अत्यविः	वायोरिन्द्रस्य निष्कृतम्	॥ 1 ॥
पवमानमवस्यवो विप्रमभि प्र गायत	सुष्वाणं देववीतये	॥ 2 ॥
पवन्ते वाजसातये सोमाः सहस्रपाजसः	गृणाना देववीतये	॥ 3 ॥
उत नो वाजसातये पवस्व बृहतीरिषः	द्युमदिन्दो सुवीर्यम्	॥ 4 ॥
ते नः सहस्रिणं रयिं पवन्तामा सुवीर्यम्	सुवाना देवास इन्द्रवः	॥ 5 ॥
अत्या हियाना न हेतृभिरसृगं वाजसातये	वि वारुमव्यमाशवः	॥ 6 ॥
वाश्रा अर्षन्तीन्दवोऽभि वृत्सं न धेनवः	दुधन्वरे गभस्तयोः	॥ 7 ॥
जुष्ट इन्द्राय मत्सरः पवमान कनिक्रदत्	विश्वा अप द्विषो जहि	॥ 8 ॥
अपघ्नन्तो अराव्याः पवमानाः स्वर्दृशः	योनावृतस्य सीदत	॥ 9 ॥

(8)

14

(म.9, अनु.1)

ऋषिः काश्यपः असितः देवलः वा	छन्दः गायत्री	देवता पवमानः सोमः
परि प्रासिष्यदत्क्विः सिन्धोरूमावधिं श्रितः	कारं विभ्रत्पुरुस्पृहम्	॥ 1 ॥
गिरा यदी सबन्धवः पञ्च व्राता अपस्यवः	पुरिष्कृण्वन्ति धर्णसिम्	॥ 2 ॥
आदस्य शुष्मिणो रसे विश्वे देवा अमत्सत	यदी गोभिर्वसायते	॥ 3 ॥
निरिणानो वि धावति जहच्छर्याणि तान्वा	अत्रा सं जिघ्रते युजा	॥ 4 ॥
नृमीभिर्यो विवस्वतः शुभ्रो न मामृजे युवा	गाः कृण्वानो न निर्णिजम्	॥ 5 ॥
अति श्रिती तिरुश्चता गव्या जिगात्यण्व्या	वग्मुमियति यं विदे	॥ 6 ॥
अभि क्षिपः समंगत मर्जयन्तीरिषस्पतिम्	पृष्ठा गृभ्णत वाजिनः	॥ 7 ॥
परि दिव्यानि मर्मशुद्धिश्चानि सोम पार्थिवा	वसूनि याह्यस्म्युः	॥ 8 ॥

(8)

15

(म.9, अनु.1)

ऋषिः काश्यपः असितः देवलः वा	छन्दः गायत्री	देवता पवमानः सोमः
एष धिया यात्यण्व्या शूरो रथेभिराशुभिः	गच्छन्निन्द्रस्य निष्कृतम्	॥ 1 ॥
एष पुरु धियायते बृहते देवतातये	यत्रामृतासु आसते	॥ 2 ॥
एष हितो वि नीयतेऽन्तः शुभ्रावता पथा	यदी तुञ्जन्ति भूर्णयः	॥ 3 ॥
एष शृङ्गाणि दोधुवच्छिशीते यूथ्योऽं वृषा	नृम्णा दधान् ओजसा	॥ 4 ॥
एष रुक्मिभिरीयते वाजी शुभ्रेभिरंशुभिः	पतिः सिन्धूनां भवन्	॥ 5 ॥
एष वसूनि पिबुना परुषा ययिवाँ अति	अव् शादेषु गच्छति	॥ 6 ॥
एतं मृजन्ति मर्ज्यमुप द्रोणेष्वायवः	प्रचक्राणं महीरिषः	॥ 7 ॥

एतमु त्वं दश क्षिपो मृजन्ति सप्त धीतर्यः । स्वायुधं मृदिन्तमम् ॥ 8 ॥

(8)

16

(म.9, अनु.1)

ऋषिः काश्यपः असितः देवलः वा	छन्दः गायत्री	देवता पवमानः सोमः
-----------------------------	---------------	-------------------

प्र ते स्रोतारं ओण्योर् रसं मदाय घृष्वये	। सर्गा न तृक्त्येतशः	॥ 1 ॥
क्रत्वा दक्षस्य रथ्यमपो वसान्मन्धसा	। गोषामण्वेषु सश्विम	॥ 2 ॥
अनप्तमप्सु दुष्टरं सोमं पवित्र आ सृज	। पुनीहीन्द्राय पातवे	॥ 3 ॥
प्र पुनानस्य चेतसा सोमः पवित्रे अर्षति	। क्रत्वा सुधस्थमासदत्	॥ 4 ॥
प्र त्वा नमोभिरिन्द्रव इन्द्र सोमा असृक्षत	। महे भराय कारिणः	॥ 5 ॥
पुनानो रूपे अव्यये विश्वा अर्षन्नभि श्रियः	। शूरो न गोषु तिष्ठति	॥ 6 ॥
दिवो न सानुं पिप्युषी धारा सुतस्य वेधसः	। वृथा पवित्रे अर्षति	॥ 7 ॥
त्वं सोम विपश्चितं तना पुनान आयुषु	। अव्यो वारं वि धावसि	॥ 8 ॥

(8)

17

(म.9, अनु.1)

ऋषिः काश्यपः असितः देवलः वा	छन्दः गायत्री	देवता पवमानः सोमः
-----------------------------	---------------	-------------------

प्र निम्नेनैव सिन्धवो घ्नन्तो वृत्राणि भूर्णयः	। सोमा असृग्रमाशवः	॥ 1 ॥
अभि सुवानास इन्द्रवो वृष्टयः पृथिवीमिव	। इन्द्रं सोमासो अक्षरन्	॥ 2 ॥
अत्यूर्मिर्मत्सरो मदः सोमः पवित्रे अर्षति	। विघ्नन्नक्षांसि देव्युः	॥ 3 ॥
आ कलशेषु धावति पवित्रे परि षिच्यते	। उक्थैर्यज्ञेषु वर्धते	॥ 4 ॥
अति त्री सोम रोचना रोहन्न भ्राजसे दिवम्	। इष्णान्तसूर्यं न चोदयः	॥ 5 ॥
अभि विप्रा अनूषत मूर्धन्यज्ञस्य कारवः	। दधानाश्चक्षसि प्रियम्	॥ 6 ॥
तमु त्वा वाजिनं नरो धीभिर्विप्रा अवस्यवः	। मृजन्ति देवतातये	॥ 7 ॥
मधोर्धारामनु क्षर तीव्रः सुधस्थमासदः	। चारुर्ऋताय पीतये	॥ 8 ॥

(7)

18

(म.9, अनु.1)

ऋषिः काश्यपः असितः देवलः वा	छन्दः गायत्री	देवता पवमानः सोमः
-----------------------------	---------------	-------------------

परि सुवानो गिरिष्ठाः पवित्रे सोमो अक्षाः	। मदेषु सर्वधा असि	॥ 1 ॥
त्वं विप्रस्त्वं क्विर्मधु प्र जातमन्धसः	। मदेषु सर्वधा असि	॥ 2 ॥
तव विश्वे सजोषसो देवासः पीतिमाशत	। मदेषु सर्वधा असि	॥ 3 ॥
आ यो विश्वानि वार्या वसूनि हस्तयोर्दधे	। मदेषु सर्वधा असि	॥ 4 ॥
य इमे रोदसी मही सं मातरैव दोहते	। मदेषु सर्वधा असि	॥ 5 ॥
परि यो रोदसी उभे सद्यो वाजेभिरर्षति	। मदेषु सर्वधा असि	॥ 6 ॥
स शुष्मी कलशेष्वा पुनानो अचिक्रदत्	। मदेषु सर्वधा असि	॥ 7 ॥

(7)

19

(म.9, अनु.1)

ऋषिः काश्यपः असितः देवलः वा	छन्दः गायत्री	देवता पवमानः सोमः
-----------------------------	---------------	-------------------

यत्सोम चित्रमुक्थ्यं दिव्यं पार्थिवं वसु	तन्नः पुनान आ भर	॥ 1 ॥
युवं हि स्थः स्वर्पती इन्द्रश्च सोम गोपती	ईशाना पिप्यत् धियः	॥ 2 ॥
वृषा पुनान आयुषु स्तनयन्नधि बर्हिषि	हरिः सन्योनिमासदत्	॥ 3 ॥
अवावशन्त धीतयो वृषभस्याधि रेतसि	सूनोर्वत्सस्य मातरः	॥ 4 ॥
कुविद्वृषण्यन्तीभ्यः पुनानो गर्भमादधत्	याः शुक्रं दुहते पर्यः	॥ 5 ॥
उप शिक्षापत्स्थुषो भियसमा धेहि शत्रुषु	पवमान विदा रयिम्	॥ 6 ॥
नि शत्रोः सोम वृष्यं नि शुष्मं नि वर्यस्तिर	दूरे वा सतो अन्ति वा	॥ 7 ॥

(7)

20

(म.9, अनु.1)

ऋषिः काश्यपः असितः देवलः वा	छन्दः गायत्री	देवता पवमानः सोमः
-----------------------------	---------------	-------------------

प्र कुविदेववीतयेऽव्यो वारोभिरर्षति	साह्वान्विश्वा अभि स्पृधः	॥ 1 ॥
स हि ष्मा जरितृभ्य आ वाजं गोमन्तमिन्वति	पवमानः सहस्रिणम्	॥ 2 ॥
परि विश्वानि चेतसा मृशसे पवसे मती	स नः सोम श्रवो विदः	॥ 3 ॥
अभ्यर्ष बृहद्यशो मघवद्भ्यो ध्रुवं रयिम्	इषं स्तोतृभ्य आ भर	॥ 4 ॥
त्वं राजेव सुव्रतो गिरः सोमा विवेशिथ	पुनानो वहे अद्भुत	॥ 5 ॥
स वह्निरप्सु दुष्टरो मृज्यमानो गर्भस्त्योः	सोमश्चमूषु सीदति	॥ 6 ॥
क्रीळुर्मखो न मह्युः पवित्रं सोम गच्छसि	दधत्स्तोत्रे सुवीर्यम्	॥ 7 ॥

(7)

21

(म.9, अनु.1)

ऋषिः काश्यपः असितः देवलः वा	छन्दः गायत्री	देवता पवमानः सोमः
-----------------------------	---------------	-------------------

एते धावन्तीन्दवः सोमा इन्द्राय घृष्वयः	मत्सुरासः स्वविदः	॥ 1 ॥
प्रवृण्वन्तो अभियुजः सुष्वये वरिवोविदः	स्वयं स्तोत्रे वयस्कृतः	॥ 2 ॥
वृथा क्रीळन्त इन्दवः सधस्थमभ्येकमित्	सिन्धोरुर्मा व्यक्षरन्	॥ 3 ॥
एते विश्वानि वार्या पवमानास आशत	हिता न सप्तयो रथे	॥ 4 ॥
आस्मिन्पिशङ्गमिन्दवो दधाता वेनमादिशे	यो अस्मभ्यमरावा	॥ 5 ॥
ऋभुर्न रथ्यं नवं दधाता केतमादिशे	शुक्राः पवध्वमर्णासा	॥ 6 ॥
एत उ त्पे अवीवशन्काष्ठां वाजिनो अक्रत	सतः प्रासाविषुर्मतिम्	॥ 7 ॥

(7)

22

(म.9, अनु.1)

ऋषिः काश्यपः असितः देवलः वा	छन्दः गायत्री	देवता पवमानः सोमः
-----------------------------	---------------	-------------------

एते सोमास आशवो रथाइव प्र वाजिनः	सर्गाः सृष्टा अहेषत	॥ 1 ॥
एते वाताइवोरवः पर्जन्यस्येव वृष्टयः	अग्नेरिव भ्रमा वृथा	॥ 2 ॥
एते पूता विपश्चितः सोमासो दध्याशिरः	विपा व्यानशुर्धियः	॥ 3 ॥
एते मृष्टा अमर्त्याः ससृवांसो न शश्रमुः	इयक्षन्तः पथो रजः	॥ 4 ॥

एते पृष्ठानि रोदसोर्विप्रयन्तो व्यानशुः	उतेदमुत्तमं रजः	॥ 5 ॥
तन्तुं तन्वानमुत्तममनुं प्रवतं आशत	उतेदमुत्तमार्यम्	॥ 6 ॥
त्वं सोमं पुणिभ्यु आ वसु गव्यानि धारयः	ततं तन्तुमचिक्रदः	॥ 7 ॥

(7)

23

(म.9, अनु.1)

ऋषिः काश्यपः असितः देवलः वा	छन्दः गायत्री	देवता पवमानः सोमः
-----------------------------	---------------	-------------------

सोमा असृग्रमाशवो मधोर्मदस्य धारया	अ॒भि विश्वा॑नि काव्या	॥ 1 ॥
अनुं प्रत्नासं आयवः पुदं नवीयो अक्रमुः	रु॒चे ज॑नन्त॒ सूर्य॑म्	॥ 2 ॥
आ पवमान नो भरार्यो अदाशुषो गयम्	कृ॒धि प्र॑जावतीरिषः	॥ 3 ॥
अ॒भि सोमा॑स आयवः पवन्ते मद्यं मदम्	अ॒भि कोशं॑ मधुश्चुतम्	॥ 4 ॥
सोमो अर्षति धर्णसिर्दधान इन्द्रियं रसम्	सु॒वीरो॑ अभिशस्तिपाः	॥ 5 ॥
इन्द्राय सोम पवसे देवेभ्यः सधुमाद्यः	इन्द्रो॑ वाजं॑ सिषाससि	॥ 6 ॥
अस्य पीत्वा मदानामिन्द्रो वृत्राण्यप्रति	ज॒घान॑ ज॒घन॑ञ्च नु	॥ 7 ॥

(7)

24

(म.9, अनु.1)

ऋषिः काश्यपः असितः देवलः वा	छन्दः गायत्री	देवता पवमानः सोमः
-----------------------------	---------------	-------------------

प्र सोमासो अधन्विषुः पवमानासु इन्द्रवः	श्री॒णाना॑ अ॒प्सु मृ॑ञ्जत	॥ 1 ॥
अ॒भि गावो॑ अधन्विषुरापो न प्रवता यतीः	पु॒नाना॑ इन्द्रमाशत	॥ 2 ॥
प्र पवमान धन्वसि सोमेन्द्राय पातवे	नृ॒भिर्यु॑तो वि नीयसे	॥ 3 ॥
त्वं सोमं नृमादनुः पवस्व चर्षणीसहे	सस्त्रि॑र्यो अनुमाद्यः	॥ 4 ॥
इन्द्रो यदद्रिभिः सुतः पवित्रं परिधावसि	अ॒र्मिन्द्र॑स्य धाम्ने	॥ 5 ॥
पवस्व वृत्रहन्तमोक्थेभिरनुमाद्यः	शु॒चिः पा॑वको अद्भुतः	॥ 6 ॥
शुचिः पावक उच्यते सोमः सुतस्य मध्वः	दे॒वावी॑रघशंसहा	॥ 7 ॥

(6)

25

(म.9, अनु.2)

ऋषिः दृळ्हच्युतः आगस्त्यः	छन्दः गायत्री	देवता पवमानः सोमः
---------------------------	---------------	-------------------

पवस्व दक्षसाधनो देवेभ्यः पीतये हरे	म॒रुद्भ्यो॑ वायवे मदः	॥ 1 ॥
पवमान धिया हितोर्भि योनिं कनिक्रदत्	ध॒र्मणा॑ वायुमा विश	॥ 2 ॥
सं देवैः शोभते वृषा कृविर्योनावधि प्रियः	वृ॒त्रहा॑ देववीतमः	॥ 3 ॥
विश्वा रूपाण्याविशन्पुनानो याति हर्यतः	य॒त्रामृ॑तासु आसते	॥ 4 ॥
अ॒रुषो॑ जनयन् गिरः सोमः पवत आयुषक्	इन्द्रं॑ गच्छन् कविक्रतुः	॥ 5 ॥
आ पवस्व मदिन्तम पवित्रं धारया कवे	अ॒र्कस्य॑ योनिमासदम्	॥ 6 ॥

(6)

26

(म.9, अनु.2)

ऋषिः इध्मवाहो दार्ढ्युतः	छन्दः गायत्री	देवता पवमानः सोमः
--------------------------	---------------	-------------------

तममृक्षन्त वाजिनमुपस्थे अदितेरधि	विप्रांसो अण्व्या धिया	॥ 1 ॥
तं गावो अभ्यनूषत सहस्रधारमक्षितम्	इन्दुं धर्तारमा दिवः	॥ 2 ॥
तं वेधां मेधयाह्यन्पवमानमधि द्यवि	धर्णसि भूरिधायसम्	॥ 3 ॥
तमह्यन्भुरिजोर्धिया संवसानं विवस्वतः	पतिं वाचो अदाभ्यम्	॥ 4 ॥
तं सानावधि जामयो हरिं हिन्वन्त्यद्रिभिः	हर्यतं भूरिचक्षसम्	॥ 5 ॥
तं त्वा हिन्वन्ति वेधसः पवमान गिरावृधम्	इन्दुविन्द्राय मत्सुरम्	॥ 6 ॥

(6)

27

(म.9, अनु.2)

ऋषिः नृमेधः आङ्गिरसः	छन्दः गायत्री	देवता पवमानः सोमः
----------------------	---------------	-------------------

एष क्विरभिष्टुतः पवित्रे अधि तोशते	पुनानो घ्नन् पस्त्रिधः	॥ 1 ॥
एष इन्द्राय वायवे स्वर्जित्परि षिच्यते	पवित्रे दक्षसार्धनः	॥ 2 ॥
एष नृभिर्वि नीयते दिवो मूर्धा वृषा सुतः	सोमो वनेषु विश्ववित्	॥ 3 ॥
एष गव्युरचिक्रदत्पवमानो हिरण्ययुः	इन्दुः सत्राजिदस्तृतः	॥ 4 ॥
एष सूर्येण हासते पवमानो अधि द्यवि	पवित्रे मत्सुरो मदः	॥ 5 ॥
एष शुष्यसिष्यददन्तरिक्षे वृषा हरिः	पुनान इन्दुरिन्द्रमा	॥ 6 ॥

(6)

28

(म.9, अनु.2)

ऋषिः प्रियमेधः आङ्गिरसः	छन्दः गायत्री	देवता पवमानः सोमः
-------------------------	---------------	-------------------

एष वाजी हितो नृभिर्विश्वविन्मनसस्पतिः	अव्यो वारं वि धावति	॥ 1 ॥
एष पवित्रे अक्षरत्सोमो देवेभ्यः सुतः	विश्वा धामान्याविशन्	॥ 2 ॥
एष देवः शुभायतेऽधि योनावमर्त्यः	वृत्रहा देववीतमः	॥ 3 ॥
एष वृषा कनिक्रददृशभिर्जामिभिर्युतः	अग्निं द्रोणानि धावति	॥ 4 ॥
एष सूर्यमरोचयत्पवमानो विचर्षणिः	विश्वा धामानि विश्ववित्	॥ 5 ॥
एष शुष्यदाभ्यः सोमः पुनानो अर्षति	देवावीरघशंसहा	॥ 6 ॥

(6)

29

(म.9, अनु.2)

ऋषिः नृमेधः आङ्गिरसः	छन्दः गायत्री	देवता पवमानः सोमः
----------------------	---------------	-------------------

प्रास्य धारा अक्षरन्वृष्णाः सुतस्यौजसा	देवाँ अनु प्रभूषतः	॥ 1 ॥
सप्तिं मृजन्ति वेधसो गृणन्तः कारवो गिरा	ज्योतिर्जज्ञानमुक्थ्यम्	॥ 2 ॥
सुषहा सोम तानि ते पुनानाय प्रभूवसो	वर्धा समुद्रमुक्थ्यम्	॥ 3 ॥
विश्वा वसूनि संजयन्पवस्व सोम धारया	इनु द्वेषांसि सृष्ट्यक्	॥ 4 ॥
रक्षा सु नो अररुषः स्वनात्समस्य कस्य चित्	निदो यत्र मुमुचमहे	॥ 5 ॥
एन्दो पार्थिवं रयिं दिव्यं पवस्व धारया	द्युमन्तं शुष्मा भर	॥ 6 ॥

(6)

30

(म.9, अनु.2)

ऋषिः बिन्दुः आङ्गिरसः

छन्दः गायत्री

देवता पवमानः सोमः

प्र धारा अस्य शुष्मिणो वृथा पवित्रे अक्षरन्	पुनानो वार्चमिष्यति	॥ 1 ॥
इन्दुर्हियानः सोतृभिर्मृज्यमानः कर्निक्रदत्	इर्यति वृग्मिन्द्रियम्	॥ 2 ॥
आ नः शुष्मं नृषाह्यं वीरवन्तं पुरुस्पृहम्	पवस्व सोम धारया	॥ 3 ॥
प्र सोमो अति धारया पवमानो असिष्यदत्	अभि द्रोणान्यासदम्	॥ 4 ॥
अप्सु त्वा मधुमत्तमं हरिं हिन्वन्त्यद्रिभिः	इन्दुविन्द्राय पीतये	॥ 5 ॥
सुनोता मधुमत्तमं सोममिन्द्राय वृज्जिणै	चारुं शर्धाय मत्स्रम्	॥ 6 ॥

(6)

31

(म.9, अनु.2)

ऋषिः राहूगणः गोतमः

छन्दः गायत्री

देवता पवमानः सोमः

प्र सोमासः स्वाध्यशुः पवमानासो अक्रमुः	रुयिं कृण्वन्ति चेतनम्	॥ 1 ॥
दिवस्पृथिव्या अधि भवेन्दो द्युमृवर्धनः	भवा वाजानां पतिः	॥ 2 ॥
तुभ्यं वाता अभिप्रियस्तुभ्यमर्षन्ति सिन्धवः	सोम वर्धन्ति ते महः	॥ 3 ॥
आ प्यायस्व समेतु ते विश्वतः सोम वृष्यम्	भवा वाजस्य संगृथे	॥ 4 ॥
तुभ्यं गावो घृतं पयो बभ्रौ दुदुहे अक्षितम्	वर्षिष्ठे अधि सानवि	॥ 5 ॥
स्वायुधस्य ते सतो भुवनस्य पते व्यम्	इन्दो सखित्वमुश्मसि	॥ 6 ॥

(6)

32

(म.9, अनु.2)

ऋषिः श्यावाश्वः आत्रेयः

छन्दः गायत्री

देवता पवमानः सोमः

प्र सोमासो मदुच्युतः श्रवसे नो मघोनः	सुता विदथे अक्रमुः	॥ 1 ॥
आदीं त्रितस्य योषणो हरिं हिन्वन्त्यद्रिभिः	इन्दुमिन्द्राय पीतये	॥ 2 ॥
आदीं हंसो यथा गुणं विश्वस्यावीवशन्मृतिम्	अत्यो न गोभिरज्यते	॥ 3 ॥
उभे सौमावचाकशन्मृगो न तक्तो अर्षसि	सीदन्नृतस्य योनिमा	॥ 4 ॥
अभि गावो अनूषत योषां जारमिव प्रियम्	अगन्नाजि यथा हितम्	॥ 5 ॥
अस्मे धेहि द्युमद्यशो मघवद्भ्यश्च मह्यं च	सनिं मेधामुत श्रवः	॥ 6 ॥

(6)

33

(म.9, अनु.2)

ऋषिः त्रितः आत्यः

छन्दः गायत्री

देवता पवमानः सोमः

प्र सोमासो विपुश्चितोऽपां न यन्त्यूर्मयः	वनानि महिषाडव	॥ 1 ॥
अभि द्रोणानि बभ्रवः शुक्रा ऋतस्य धारया	वाजं गोमन्तमक्षरन्	॥ 2 ॥
सुता इन्द्राय वायवे वरुणाय मरुद्भ्यः	सोमा अर्षन्ति विष्णावे	॥ 3 ॥
तिस्रो वाच उदीरते गावो मिमन्ति धेनवः	हरिरेति कर्निक्रदत्	॥ 4 ॥
अभि ब्रह्मीरनूषत यद्ब्रह्मृतस्य मातरः	मर्मृज्यन्ते दिवः शिशुम्	॥ 5 ॥
रायः समुद्रांश्चतुरोऽस्मभ्यं सोम विश्वतः	आ पवस्व सहस्रिणः	॥ 6 ॥

(6)

34

(म.9, अनु.2)

ऋषिः त्रितः आत्यः

छन्दः गायत्री

देवता पवमानः सोमः

प्र सुवानो धारया तनेन्दुर्हिन्वानो अर्षति	रुजदृळ्हा व्योजसा	॥ 1 ॥
सुत इन्द्राय वायवे वरुणाय मरुद्भ्यः	सोमो अर्षति विष्णवे	॥ 2 ॥
वृषाणं वृषभिर्यतं सुन्वन्ति सोममर्षिभिः	दुहन्ति शकमना पर्यः	॥ 3 ॥
भुवत्त्रितस्य मर्ष्यो भुवदिन्द्राय मत्सरः	संपैरज्यते हरिः	॥ 4 ॥
अभीमृतस्य विष्टपं दुहते पृश्निमातरः	चारुं प्रियतमं हविः	॥ 5 ॥
समेनमहुता इमा गिरौ अर्षन्ति सुसुतः	धेनूर्वाश्रो अवीवशत्	॥ 6 ॥

(6)

35

(म.9, अनु.2)

ऋषिः प्रभूवसुः आङ्गिरसः

छन्दः गायत्री

देवता पवमानः सोमः

आ नः पवस्व धारया पवमान रयिं पृथुम्	यया ज्योतिर्विदासि नः	॥ 1 ॥
इन्दो समुद्रमीङ्खय पवस्व विश्वमेजय	रायो धृता न ओजसा	॥ 2 ॥
त्वया वीरेण वीरवोऽभि ष्याम पृतन्यतः	क्षरा णो अभि वार्यम्	॥ 3 ॥
प्र वाज्मिन्दुरिष्यति सिषासन्वाजसा ऋषिः	व्रता विदान आयुधा	॥ 4 ॥
तं गीर्भिर्वाचमीङ्खयं पुनानं वासयामसि	सोमं जनस्य गोपतिम्	॥ 5 ॥
विश्वो यस्य व्रते जनो दाधार धर्मणस्पतैः	पुनानस्य प्रभूवसोः	॥ 6 ॥

(6)

36

(म.9, अनु.2)

ऋषिः प्रभूवसुः आङ्गिरसः

छन्दः गायत्री

देवता पवमानः सोमः

असर्जि रथ्यो यथा पवित्रे चम्बोः सुतः	कार्ष्मन्वाजी न्यक्रमीत्	॥ 1 ॥
स वह्निः सोम जागृविः पवस्व देववीरति	अभि कोशं मधुश्चुतम्	॥ 2 ॥
स नो ज्योतीषि पूव्यं पवमान् वि रोचय	क्रत्वे दक्षाय नो हिनु	॥ 3 ॥
शुम्भमान ऋतायुभिर्मृज्यमानो गर्भस्त्योः	पवते वारे अव्यये	॥ 4 ॥
स विश्वा दाशुषे वसु सोमो दिव्यानि पार्थिवा	पवतामान्तरिक्ष्या	॥ 5 ॥
आ दिवस्पृष्टमश्चयुर्गव्ययुः सोम रोहसि	वीरयुः शवसस्पते	॥ 6 ॥

(6)

37

(म.9, अनु.2)

ऋषिः रहुगणः आङ्गिरसः

छन्दः गायत्री

देवता पवमानः सोमः

स सुतः पीतये वृषा सोमः पवित्रे अर्षति	विघ्नक्षीसि देव्युः	॥ 1 ॥
स पवित्रे विचक्षणो हरिरर्षति धर्णसिः	अभि योनिं कर्निक्रदत्	॥ 2 ॥
स वाजी रोचना दिवः पवमानो वि धावति	रुक्षोहा वारमव्ययम्	॥ 3 ॥
स त्रितस्याधि सान्वि पवमानो अरोचयत्	जामिभिः सूर्यं सह	॥ 4 ॥
स वृत्रहा वृषा सुतो वरिवोविददाभ्यः	सोमो वाजमिवासरत्	॥ 5 ॥
स देवः क्विनेषितोऽभि द्रोणानि धावति	इन्दुरिन्द्राय मंहना	॥ 6 ॥

(6)

38

(म.9, अनु.2)

ऋषिः रहूगणः आङ्गिरसः	छन्दः गायत्री	देवता पवमानः सोमः
----------------------	---------------	-------------------

एष उ स्य वृषा रथोऽव्यो वारैभिरर्षति	गच्छन्वाजं सहस्रिणम्	॥ 1 ॥
एतं त्रितस्य योषणो हरिं हिन्वन्त्यद्रिभिः	इन्दुमिन्द्राय पीतये	॥ 2 ॥
एतं त्यं हरितो दशं मर्मज्यन्ते अपस्युवः	याभिर्मदाय शुम्भते	॥ 3 ॥
एष स्य मानुषीष्वा श्येनो न विक्षु सीदति	गच्छञ्जारो न योषितम्	॥ 4 ॥
एष स्य मद्यो रसोऽव चष्टे दिवः शिशुः	य इन्दुर्वारमाविशत्	॥ 5 ॥
एष स्य पीतये सुतो हरिरर्षति धर्णसिः	क्रन्दुन्योनिमभि प्रियम्	॥ 6 ॥

(6)

39

(म.9, अनु.2)

ऋषिः बृहन्मतिः आङ्गिरसः	छन्दः गायत्री	देवता पवमानः सोमः
-------------------------	---------------	-------------------

आशुरर्ष बृहन्मते परि प्रियेण धाम्ना	यत्र देवा इति ब्रवन्	॥ 1 ॥
परिष्कृण्वन्ननिष्कृतं जनाय यातयन्निषः	वृष्टिं दिवः परि स्रव	॥ 2 ॥
सुत एति पवित्र आ त्विषिं दधान् ओजसा	विचक्षाणो विरोचयन्	॥ 3 ॥
अयं स यो दिवस्परि रघुयामा पवित्र आ	सिन्धोरूर्मा व्यक्षरत्	॥ 4 ॥
आविवासन्परावतो अथो अर्वावतः सुतः	इन्द्राय सिच्यते मधु	॥ 5 ॥
समीचीना अनूषत हरिं हिन्वन्त्यद्रिभिः	योनावृतस्य सीदत	॥ 6 ॥

(6)

40

(म.9, अनु.2)

ऋषिः बृहन्मतिः आङ्गिरसः	छन्दः गायत्री	देवता पवमानः सोमः
-------------------------	---------------	-------------------

पुनानो अक्रमीदुभि विश्वा मृधो विचर्षणिः	शुम्भन्ति विप्रं धीतिभिः	॥ 1 ॥
आ योनिमरुणो रुहद्रमदिन्द्रं वृषा सुतः	ध्रुवे सदेसि सीदति	॥ 2 ॥
नू नो रयिं महामिन्द्रोऽस्मभ्यं सोम विश्वतः	आ पवस्व सहस्रिणम्	॥ 3 ॥
विश्वा सोम पवमान द्युम्नानीन्दुवा भर	विदाः सहस्रिणीरिषः	॥ 4 ॥
स नः पुनान आ भर रयिं स्तोत्रे सुवीर्यम्	जरितुर्वर्धया गिरः	॥ 5 ॥
पुनान इन्दुवा भर सोम द्विबर्हसं रयिम्	वृषन्निन्दो न उक्थ्यम्	॥ 6 ॥

(6)

41

(म.9, अनु.2)

ऋषिः मेध्यातिथिः काण्वः	छन्दः गायत्री	देवता पवमानः सोमः
-------------------------	---------------	-------------------

प्र ये गावो न भूर्णयस्त्वेषा अयासो अक्रमुः	घ्नन्तः कृष्णामप त्वचम्	॥ 1 ॥
सुवितस्य मनामहेऽति सेतुं दुराव्यम्	साहांसो दस्युमव्रतम्	॥ 2 ॥
शृण्वे वृष्टेरिव स्व्नः पवमानस्य शुष्मिणः	चरन्ति विद्युतो दिवि	॥ 3 ॥
आ पवस्व महीमिषं गोमदिन्द्रो हिरण्यवत्	अश्वोवृद्वाजवत्सुतः	॥ 4 ॥
स पवस्व विचर्षण आ मही रोदसी पृण	उषाः सूर्यो न रश्मिभिः	॥ 5 ॥
परि णः शर्मयन्त्या धारया सोम विश्वतः	सरां रुसेव विष्टपम्	॥ 6 ॥



(6)

42

(म.9, अनु.2)

ऋषिः मेध्यातिथिः काण्वः	छन्दः गायत्री	देवता पवमानः सोमः
-------------------------	---------------	-------------------

जूनर्यन्नोचना दिवो जूनर्यन्नप्सु सूर्यम्	वसानो गा अपो हरिः	॥ 1 ॥
एष प्रत्नेन मन्मना देवो देवेभ्यस्परि	धारया पवते सुतः	॥ 2 ॥
वावृधानाय तूर्वीये पवन्ते वाजसातये	सोमाः सहस्रपाजसः	॥ 3 ॥
दुहानः प्रत्नमित्पयः पवित्रे परि षिच्यते	क्रन्दन् देवाँ अजीजनत्	॥ 4 ॥
अभि विश्वानि वार्याभि देवाँ ऋतावृधः	सोमः पुनानो अर्षति	॥ 5 ॥
गोमन्नः सोम वीरवृदश्वावृद्वाजवत्सुतः	पवस्व बृहतीरिषः	॥ 6 ॥

(6)

43

(म.9, अनु.2)

ऋषिः मेध्यातिथिः काण्वः	छन्दः गायत्री	देवता पवमानः सोमः
-------------------------	---------------	-------------------

यो अत्येव मृज्यते गोर्भिर्मदाय हर्यतः	तं गीर्भिर्वासयामसि	॥ 1 ॥
तं नो विश्वा अवस्युवो गिरः शुम्भन्ति पूर्वथा	इन्दुमिन्द्राय पीतये	॥ 2 ॥
पुनानो याति हर्यतः सोमो गीर्भिः परिष्कृतः	विप्रस्य मेध्यातिथेः	॥ 3 ॥
पवमान विदा रयिमस्मभ्यं सोम सुश्रियम्	इन्दो सहस्रवर्चसम्	॥ 4 ॥
इन्दुरत्यो न वाजसृत्कनिक्रन्ति पवित्र आ	यदक्षारति देवयुः	॥ 5 ॥
पवस्व वाजसातये विप्रस्य गृणतो वृधे	सोम रास्व सुवीर्यम्	॥ 6 ॥

| इति षष्ठाष्टके अष्टमोऽध्यायः समाप्तः ।

| इति षष्ठोऽष्टकः समाप्तः ।